

ispīhk kā-sāh-sīpihkēyihtamohiht ahcahk

asohtēwak

paskwāwipakwa, maskosiya maskotēhk,
mihkominisāhtik, okāminakasīwāhtikwak
kakwē-otihtinamwak ocihcīsiwāwa asici
ē-kikamonyiki nitāsināhk ē-miyāskawāyāhkik.
tahto-wāpan nimiyāhkasikān ta-nanāskomak kikāwīnaw
ōma miyikowisiwin
kā-kī-ohpinamān wāskikanihk ohci.
maskosīwakāhk
pīsim kā-kisisot nimāh-minihkwēhik
nipiy kā-nīmōpēyān
nipapāmowatānihk.

wāpahki nēmitanaw askiy wī-tipiskam nitānis,
okosisimāw-nipiy kā-kī-wayawīkwāskociwahk
ēwako ōma kā-tipahamātowasinahamān ispī kā-nihtāwikit.
otiskotēw, ē-kāmwāci-wāsēyāsiniyik,
nōkwaniyw ohkwākanikh ohci.

opimohtēwak kā-ayahpipayicik pa-pimitācimowak
ē-nipahi-kisāstēyik.
itwahikanāhtikwa kikiskinohtahikonaw asinīskāsihk ēkwa yēkawihk.
nitāh-āmaciwānān posiskatināhk, ē-āsōsimoyāhk ispatināhk
acyaw ē-nākatawāpahtamāhk kā-wāpāstēki oskana.
namōya nipēyakon.
kā-kiptowēhk, nikihc-āniskötāpānak
niwīci-pimohtēmikwak, ē-askowicik, ē-wāsakāmēskawicik, ē-wīcēwicik.

nimāmawipayīstamwānān mistatim oskana
ka-āpacihātāyāhk ka-kitohcikēyāhk
niwēwēpipayinān ēkwa ninikamonān “mistatim ēkā kā-owīhowinit”.
kā-nēhiyaw-isīhcikēhk nipimitisahēnān mistatim omēskanās,
ē-miyikawiyāhk omaskihkīma anita kā-pakitinahk.

nimānokānān sākahikanihk cīki minātakāhk.
ē-pawātamān, sēnipānasākay nikikiskēn,
ē-atamiskawicik nēwo ē-āh-asēyaticik
iskwēwak ē-nāh-nikamocik ēkwa ē-pāh-pakamahwācik mistikwaskihkwa.
niwīsāmikonān nitōtēm ēkwa niya
ka-pahkopēyāhk
ē-askowikoyāhkik ē-sawēyimikoyāhkik.

timāmatināhk ayāwak
nōhkomak ēkwa nimosōmak,
mistasiniyak ē-āhkwēhtawapicik.
pāmwayēs ē-nīhtaciwēyāhk, cistēmāwa nipakitinamawānān
ōhi kayās-oskana kā-kanawāpamikoyāhk ē-pimohtēyāhk.
tāpiskōc awāsisak ninīhtaciwānān, ē-nātawāpēnamāhk oyākana kā-masinahikātēki,
niwāsakāmapinān ē-āsōnamātoyāhk nimāmitonēyihcikanināna.

nikī-nikamonān ē-sipwēhtēyāhk kayās-yik wahaskānihk ohci, nikī-kākīsimonān
ē-miyāskamāhk nōtikwēw sākahikan. namōya wāhyaw ōta ohci
ohkomimāwak kī-nipahāwak ta-pimācihācik otayisiyinīmiwāwa.
nikī-tahkoskātēnān asinīwi-tahkoskēwinikh
nikī-tahkāpāwatānān nisitināna mistikōsiw-sīpīhk
nikī-kanawāpamānān kihēw ē-ma-mīcit
wiyawiyiw mostoswa kā-kī-pahkisiniyt
kīskahcāhk ohci.

ē-pimohtēyāhk, ē-pimohtēyāhk,
ē-wiyipikātēyāhk, misita
kā-pīthopēkipayiki misita, nimiyo-asamānānak nitahcahkonānak, niyawināna mīna.
yāh-yēhyēw yōtin,
yōski-sāminam nihkwākanināna kā-pāhkwāyiki.

ayēnānēwomitānaw nititahtopiponān ahpō nawaciko ē-osk-āyiwiyāhk,
nanātohk ayisiyiniwak ē-wīcēwākanihtoyāhk.
nimāmawi-pimohtēhonān.

© Louise B. Halfé – Sky Dancer

Poète officielle du Parlement

Traduction : © Jean Okimāsis et Arok Wolvengrey avec Louise B. Halfé – Sky Dancer